

ANG PAGBABAHIN NI PABLING TERMS OF USE

By downloading this PDF file, you agree to the following terms:

1. This PDF file is for personal and classroom use ONLY.
2. You may print this PDF file and distribute the printouts to your children or students, but you MAY NOT distribute the printouts to other parents or teachers.
3. You MAY NOT share digital copies of this PDF file with anyone. Just refer them to samutsamot.com.
4. You MAY NOT print and distribute this PDF file for profit or use it for any commercial purpose.
5. You MAY NOT upload this PDF file or any part of it in any other website such as (but not limited to) *Scribd* or *SlideShare*, or cloud storage sites such as (but not limited to) *Google Drive* or *Dropbox*. The artists mentioned below own the copyrights to the clip art images and font used in this PDF file. Uploading this file in another website is an infringement of their copyrights.

If you have any questions regarding the use of this PDF file, you may e-mail me at samutsamot.mom@gmail.com.

This PDF file features clip art by Samut-samot Mom, Kari Bolt, and Little Red's Clip Art. It also uses a font by Kimberly Geswein.



<https://www.teacherspayteachers.com/Store/Kari-Bolt-Clip-Art>

<https://www.teacherspayteachers.com/Store/Littlered>

<https://www.teacherspayteachers.com/Store/Kimberly-Geswein-Fonts>

<http://www.kimberlygeswein.com/>

Pangalan _____

Petsa _____

Magbasa tayo!



ANG PAGBABAHIN NI PABLING

Si Pabling ay isang batang matsing. Nakatira siya sa isang gubat kasama ang kanyang mag-anak na matsing. Mahilig maglaro sa gubat si Pabling. Gusto niya ang paglalambitin sa mga sanga at baging. Mahilig din siya maglaro sa sahi ng gubat.

Isang umaga, biglang nagising si Pabling dahil sa kanyang pagbabahin. “HAT-SING! HAT-SING! HAT-SING!” Narinig siya ng kanyang Kuya Pedring.

“O, Pabling. Bakit ka bumabahin?” tanong ni Kuya Pedring.

“Hindi ko nga alam, Kuya. Bigla na lang akong naha—HA—HAT-SING!”

“Alam ko na, Pabling. Upang matigil ang iyong pagbabahin, lumambitin ka sa isang baging,” payo ng kanyang Kuya Pedring.


“Sige, Kuya! HAT-SING! Gagawin ko ang sinabi mo! Lalambitin ako sa isang baging hanggang tumigil ang aking pagha—HA—HAT-SING!” sagot naman ni Pabling.


At iyon nga ang ginawa ni Pabling. Matagal siyang lumambitin sa isang baging, ngunit tuloy pa rin ang kanyang pagbabahin.

“HA...HA...HAT-SING! HAT-SING!”


Hindi nagtagal, napadaan ang kanyang ate matsing na si Ate Ningning. Napatingala siya kay Pabling na nakalambitin sa baging.

“Hoy, Pabling! Anong ginagawa mo rian?” tanong ng kanyang Ate Ningning.





Magbasa tayo!



“Ate Ningning, kanina pa—HAT-SING!—kasi ako bumabahin. Payo ni Kuya Pedring—HAT-SING!—na lumambitin ako sa isang baging—HAT-SING!—para matigil ang aking pagbabahin. Pero...parang wala naman—HAT-SING!—epekto itong ginagawa ko,” malungkot na sagot ni Pabling, sabay singhot.

“Ay, naku! Naniwala ka naman sa iyong Kuya Pedring. Binibiro ka lang niya. Hindi lunas sa pagbabahin ang paglalambitin sa baging,” sabi ni Ate Ningning.

“Hindi, Ate? Eh, ano ang—HAT-SING!—magagawa ko para matigil ito? Namumula na nga—HAT-SING!—ang ilong ko!” tanong ng nakakaawang Pabling.


“Ang dapat mong gawin para matigil ang iyong pagbabahin ay kumain ng sampung saging,” payo ni Ate Ningning.

“Ha? Sampung—HAT-SING!—saging? Sa bagay, nagugutom na rin ako. HAT-SING!” sagot naman ni Pabling.

Bumaba si Pabling mula sa baging at naghanap ng puno ng saging. Nakahanap siya ng puno na may maraming saging. Pumitas siya ng sampung saging. Kinain niya ang bawat isa habang patuloy siyang bumabahin.

“Ika-sampung saging—HAT-SING!—ko na ito. Bakit ayaw pa rin mawala ang aking—HAT-SING!?” Busog ngunit malungkot na naglakad pauwi si Pabling habang patuloy ang kanyang pagbabahin.

Mula sa paanan ng kanilang tahanan na puno, narinig ng ina ni Pabling ang kanyang pagbabahin. Sinalubong niya si Pabling.



Magbasa tayo!



“Pabling, anak, mukhang malubha ang iyong pagbabahin,” sabi ng ina ni Pabling.

“Opo, Mama. Kanina pa po ito. HAT-SING! Sabi ni Kuya Pedring lumambitin ako sa baging. Pero hindi naman po tumigil ang aking—HAT-SING! Sabi naman po ni Ate Ningning, kumain ako ng sampung saging. Pero hindi pa rin po tumigil ang aking—HAT-SING! Mama, ano po ang aking gagawin? HAT-SING!” pakiusap ni Pabling sa kanyang ina.

“Hay, Pabling. Ikaw lang ang makapipigil sa iyong pagbabahin. Hindi mo ba nahalata na ikaw ay gusgusin? Ilang araw ka na bang hindi naliligo? Marumi at maalikabok na ang iyong katawan. Ang alikabok na iyan ay pumapasok sa iyong ilong kaya ikaw ay bumabahin,” paliwanag ng ina ni Pabling.

Naalala ni Pabling na maalikabok ang kanyang katawan dahil sa paglalaro sa sahig ng gubat. “Ay, Mama! Paumahin po! HAT-SING! Matagal na akong hindi naliligo! HAT-SING! Pupunta muna po ako sa ilog!”

Mabilis na tumakbo si Pabling sa ilog na malapit sa kanilang tahanan. Matagal siyang naligo roon. Hinugasan niya nang mabuti ang bawat bahagi ng kanyang katawan. Nahalata ni Pabling na hindi na siya bumabahin.

“Hay, salamat! Tumigil na rin ang aking pagbabahin. Mula ngayon, madalas na akong maliligo,” pangako ni Pabling sa kanyang sarili.

“Nabiro ako ni Kuya Pedring. Hindi naman paglalambitin sa baging ang lunas sa pagbabahin. Nabiro rin ako ni Ate Ningning. Hindi naman sampung saging ang lunas sa pagbabahin. Buti na lang, tinulungan ako ni Ma—HIK! Ay, naku! Sinisinok ako! HIK!”

WAKAS

Pangalan _____ Petsa _____



Kaya mo ito!

Pagsusulit Tungkol sa Binasa

A. Ayusin nang sunod-sunod ang mga pangyayari sa kuwento.
Isulat ang mga bilang 1 hanggang 10 sa patlang.

- _____ Pinayuhan ni Ningning si Pabling na kumain ng maraming saging.
- _____ Naligo si Pabling sa ilog.
- _____ Hindi pa rin tumitigil ang pagbabahin ni Pabling.
- _____ Lumambitin si Pabling sa baging dahil sa payo ni Pedring.
- _____ Sinabi ng ina ni Pabling ang dahilan ng kanyang pagbabahin.
- _____ Kumain si Pabling ng maraming saging.
- _____ Tumigil ang pagbabahin ni Pabling.
- _____ Umuwi si Pabling na patuloy ang kanyang pagbabahin.
- _____ Nagising si Pabling ng kanyang paghahatsing.
- _____ Si Pabling ay kinausap ng kanyang ina.

B. Buuin ang pangungusap ayon sa mga pangyayari sa kuwento.
Bilugan ang titik ng tamang sagot.

1. Si Pabling ay isang batang _____ .
a. kambing b. baboy c. matsing
2. Hindi tumitigil ang _____ ni Pabling.
a. pagtatawa b. pagbabahin c. paglalaro
3. Pinayuhan siya ni Kuya Pedring na _____ sa baging.
a. lumambitin b. maglaro c. kumain

Pangalan _____ Petsa _____



Kaya mo ito!

4. Pinayuhan siya ni Ate Ningning na kumain ng _____ .
a. siyam na saging b. pitong saging c. sampung saging
5. Sabi ng ina ni Pabling, si Pabling ay _____ .
a. gusgusin b. sinungaling c. masayahin
6. Ang _____ sa katawan ni Pabling ang dahilan ng kanyang pagbabahin.
a. balat ng saging b. baging c. alikabok
7. Ang _____ sa ilog ay ang lunas sa pagbabahin ni Pabling.
a. pag-inom b. pagligo c. paglalaro
8. Natigil nga ang pagbabahin ni Pabling ngunit siya naman ay _____ .
a. sininok b. inuubo c. nahatsing

C. Sagutin ang bawat tanong sa ibaba gamit ang buong pangungusap. Isulat mo ang iyong sagot sa kahon.

1. Ano sa palagay mo ang naramdaman ni Pabling noong hindi matigil ang kanyang pagbabahin?

2. Kapag ikaw ay may problema na hindi mo mahanap ang sagot o lunas, kanino ka madalas humingi ng tulong?